



Austevoll kommune

Hordaland fylkeskommune
Postboks 7900
5020 BERGEN

Vår ref.	Arkivkode	Dykkar ref.	Dato
17/253-17/5839JpID/MST	17/253	2014/11042	12.05.2017

Høyringsuttale regional kystsoneplan for Sunnhordland og ytre Hardanger

Austevoll formannskap handsama sak om regional kystsoneplan for Sunnhordland og ytre Hardanger i møte 18.04.17. Det vart vedteken slik uttale i saka:

«Austevoll formannskap vil sterkt rå frå at regional kystsoneplan for Sunnhordland og ytre Hardanger (heretter omtala som planframlegget) vert vedteken slik den ligg føre, med følgjande grunngeving:

- Det er grunnleggjande motstrid mellom planframlegget og den gjeldande kommuneplanen og godkjente reguleringsplanar. I kommuneplanen er det blant anna avsett fleire område til bustad, hytte, naust og næringsverksemd som ligg under «arealsone landskapstype». I tillegg er det fleire godkjente reguleringsplanar som ligg under «arealsone landskapstype».
- I samsvar med pbl. § 8-3 skal regionale planar med retningslinjer og rammer for framtidig utbygging innehalde særskilt vurdering og skildring av planens verknader for miljø og samfunn. Gitt planframleggets openbare konsekvensar for samfunn, både knytt til busetnad og næringsverksemd, krev Austevoll kommune at det vert gjennomført konsekvensutgreiing av desse forholda, med heimel i pbl. Hordaland fylkesting kan ikkje vedta ein plan, slik den ligg føre, der konsekvensar av planframlegget, som er peika på av berørte kommunar og næringsinteresser, ikkje er gjort greie for gjennom konsekvensutgreiing.
- Austevoll formannskap ber om at planframlegget vert vurdert opp mot regionale og nasjonale planar og målsettingar for vekst og auka verdiskaping innan havbruksnæringa. Planframlegget legg ikkje opp til at det er mogleg med vekst og utvikling innan havbruksnæringa i planområdet. Ein viser samstundes til at område som er avsett til akvakultur, vest om Stolmen, er ueigna til dette føremålet.
- Austevoll kommune meiner at Hordaland fylkeskommune ikkje har oppfylt pbl. krav til «samarbeid», og understrekar at kommunen oppfattar at vedtak av ein regional plan langt på veg krev tilslutnad frå berørte kommunar.
- Planframlegget kjem i konflikt med interkommunal strandsonenplan for Sunnhordland som er under utarbeiding. Kystsoneplanen går inn i strandsona, med detaljerte retningslinjer.

- Austevoll kommune peikar òg på paradokset at det er detaljerte retningslinjer knytt til naust og båthamner, medan det knapt er omtala korleis havbruksnæringa skal sikrast infrastruktur, kaiar og areal på land.
- Austevoll kommune meiner vesentlege juridiske og faktiske sider ved planframlegget må avklarast før Hordaland fylkeskommune handsamar planen vidare. Austevoll kommune viser mellom anna til at det er skapt tvil om Hordaland fylkeskommune har heimel til å drive slik planlegging som planframlegget legg opp til. Ein viser mellom anna til at arealsone landskapstype kan ha verknad etter pbl. føresegn om «omsynssoner», og er dermed eit verkemiddel som ligg til kommunal planlegging og ikkje regional planlegging. I tillegg er det skapt tvil om fylkeskommunen har heimel etter gjeldande teiknereglar for regionale planar. Austevoll kommune meiner derfor at Hordaland fylkeskommune må avklara juridiske atterhald med planframlegget før planen kan vedtakast.
- Austevoll kommune viser til at store sjø og landområde er foreslått som «arealsone landskapsområde», der ein m.a. hindrar framtidig akvakultur og inngrep på land, noko som vil ha store konsekvensar for ei av fylkets aller viktigaste næringar. Samstundes er det ikkje klart kva verknader arealsona vil ha på aktivitet på land. Austevoll formannskap meiner ei slik vurdering er heilt avgjerande, og bed derfor at Hordaland fylkeskommune avklarar verknadane av planframlegget.
- Austevoll kommune meiner til slutt at ein regional plan bør vere overordna og retningsgivande, og at Hordaland fylkeskommune ikkje skal gjere vedtak om regionale planar med detaljerte retningslinjer som tilrådd, og med plankart.

Ein viser elles til Austevoll kommunes uttale, avgitt 01.10.2015.»

Eit samrøystes Austevoll formannskap vedtok uttalen.

Med helsing



Morten Storebø
Ordfører

Dette dokumentet er elektronisk godkjent.